

弘

簡

錄

弘簡錄卷一百四十一

臺諫 宋五之二

田錫

李昌齡

從子 絃緯

范正辭

子 諷

王濟

祖 卿

呂文仲

孫何

父 康 弟 璿

李及

趙積

陳從易

薛田

寇弼

李行簡

姜遵

陳琰

張錫

趙及

王臻

王沿

子 鼎

施昌言

田錫字表聖嘉州洪雅人幼聰悟好讀書屬文楊徽之宋白皆厚遇之爲之延譽聲稱翕然太平興國三年進士高等釋褐將作監丞通判宣州遷著作郎京西北路運判六年拜左拾遺直史館賜緋魚并錢五十萬性好直言既居諫職極陳時務大有

裨益言軍國要機者一。幽燕竊據兵所當興。雖稟宸謀。必資武
力。項歲王師平太原。稽功賞者二載。願因郊禋之禮。議平戢之
功。駕馭戎臣。莫此爲重。言朝廷大體者四。其一。交州未下。老師
費財。縱使得之。如獲石田。自古聖人不務廣疆土。惟務廣德業。
聲教遠被。自當來賓。臣願務脩德以來遠。何必以蕞爾蠻邦。上
勞震怒乎。其二。諫官不聞廷爭。給舍不聞封駁。左右史不聞升
殿。陸記言。勳御史不敢彈奏。中書未嘗訪以政事。集賢院雖有
書籍。而無職官。祕書省雖有職官。而無圖籍。豈聖朝美事乎。臣
願擇才任人。使各司其局。其三。海宇平寧。京師富庶。軍營馬監。
靡不恢崇。佛寺道宮。悉皆輪奐。加又闢西苑。廣御池。願尚書省
極其湫隘。郎曹無本局。尚書無廳事。九寺三監。寓天街之兩廊。
貢院就武成王廟。豈太平制度耶。臣願別脩省寺。用列職官。其

四獄官枷杻鉗鎖尺寸斤兩並載刑書未聞以鐵爲枷者。況隆平之時。於法所無。去之可矣。疏奏優詔褒賜。有謂宜少晦以遠讒忌。荅曰。事君之誠。惟恐不竭。矧天植其性。豈爲一賞奪邪。時趙普。盧多遜。令有司受羣臣章奏。必先白。然後聞。又令於閣門。皆狀不敢妄陳利便。希望恩榮。錫以爲失。至公之體。普引荅謝。多遜不悅。六年。罷爲河北運副。復上邊要四事。一謂動靜之機。不可妄舉。夫動爲用。兵靜。靜持重。應動而靜。則養寇以生。奸應靜而動。則失時。以敗事。動靜中節。乃得其宜。今北鄙釋騷。皆以居邊任者。規羊馬。細利。矜捷。捕小勝。賈怨結仇。與戎致寇。職此之由。願申飭將帥。慎固封守。勿尚小功。許通互市。俘獲蕃口。撫而還之。務使河朔之民得務農業。亭障之地可積軍儲。然後待其亂而取之。則克乘其衰。而兵之則降。力省功倍。誠要舉也。二

謂安危之理不可輕言。夫國家務大體求至治則安。舍近謀勞遠務則危。爲君有常道。爲臣有常職。是務大體也。上不拒諫。下不隱情。是求至治也。若漢武伐單于。唐宗討遼東。是舍近謀遠也。沙漠窮荒。得之無用。因上所欲。不敢盡言。言而見聽。未必蒙福。一有不從。方且虞禍。惡在其務大體而求至治乎。三謂利害相生。變易不定。兵書曰。不能盡知用兵之害者。則不能盡知用兵之利。蓋事有可進而退。則害成。可退而進。則違利。可速而緩。則利必失。可緩而速。則害必至。可誅而赦。則奸宄生。心可赦而誅。則忠勇解體。可賞而罰。則害勤勞之功。可罰而賞。則利僭踰之輩。誠不可以不審也。四謂取舍無惑。思慮必精。夫孟賁之狐疑。不如童子之一得。倘若差之毫釐。繆以千里。自國家圖燕以來。連兵未解。財用不得不耗。人心不得不憂。願陛下精思慮。決

取舍無使曠日持久。窮兵極武。書奏上甚嘉之。七年改右補闕。復上章論事。徙知相與睦州。吳越舊阻禮教。錫爲建孔廟。請給諸生經籍。自是人知向學。會文明殿災。極言時政。上納焉。轉起居舍人。還判登聞鼓院。兼知制誥。尋加兵部員外郎。端拱二年京畿旱。上章陰陽失和。調燮倒置。上侵下之職。而燭理未盡。下知上之失。而規過未能。帝及宰相皆不悅。出知陳州。坐稽留殺人獄。責授海州團練副使。徙單州。召爲工部員外郎。復論時政闕失。俄詔直集賢院。眞宗遷吏部郎中。使秦隴。還連上章言陝西數十州。若干靈夏之役。生民重困。上爲戚然。命同知審官院兼通進銀臺司。賜金紫。與魏廷式聯職。以議論不協。出知秦州。彗星見。召見便殿。諭以不半歲卽召成平三年。宋白應詔舉賢良方正。屢召對。願帝以皇王之道治天下。舊時御覽無益治道。

臣每讀書思以所得上補聖聰請鈔略四部別爲御覽三百六十卷萬幾之暇日覽一卷經歲而畢冀以涓埃之微上裨天地之德俾功業與堯舜比崇而生靈亦躋仁壽之域矣上善其言詔史館以羣書借之又見唐黃門侍郎趙弘智爲高宗講孝經舉其要切者盡之曰天子有爭臣七人雖無道不失其天下憲宗采史漢二國以來經濟要說并前代君臣事迹書于屏間臣每覽經史子集因取其要語列爲十卷輒用進獻題之御屏寘之座右日夕觀省則聖德日新與湯武比隆矣時京東西淮南水災遣使振恤貧民平決獄訟錫言朝廷檢勘災傷乃是虛名施行賑貸亦非實事點募拳勇云守本城尋卽押赴京師今災沴之餘盜賊若起適足以貽宵旰之憂而已帝爲動容五年再掌銀臺覽天下奏章及詔敕不便者悉條奏其事上對宰相稱

錫得諍臣之體卽日命兼侍御史知雜事凡遇進見容色必莊目之曰此吾汲黯也。俄擢右諫議大夫史館脩撰連上八疏皆直言時政得失六年冬病卒年六十四遺表勸上以慈儉守位以清淨化人居安思危在治思亂上覽之惻然謂李沆曰田錫直臣朝廷少有關失方在思慮其章奏已至若此諫官不可多得天何奪之速乎嗟惜久之特贈工部侍郎錄其二子並爲大理評事給俸終喪爲人動必以禮言必以法賢不肖咸憚服之耿介寡合未嘗趨權貴之門居公庭危坐終日無懈容慕魏徵李絳爲人以盡規獻替爲已任立朝以來章疏五十有二以爲諫臣任職之常言苟獲從幸也豈可藏副示後謗時賢直耶悉命焚之然性凝執治郡無稱所著有咸平集五十卷

用曰宋室封章實自錫始言皆可用不爲徒矢鄭興趙公

誠可俛美。天假之年尚猶未止。嗚呼若人何幸達此。

李昌齡字天錫。宋州楚丘人。曾祖確。膠水令。祖譚。邯鄲令。父運。太常卿。昌齡登進士。除大理評事。通判銀合二州。歷將作監丞。右贊善大夫。嘗獻金明池詩百韻。太宗嘉之。擢右拾遺補闕。直史館。賜緋。俄出知滁州。內艱。起爲淮南運使。轉戶部員外郎。知廣州。淳化二年代還。言廣州每歲商舶至。官盡增價買之。良苦相雜。自今擇其良者如價給之。苦者恣令轉貨。勿禁詔從之。賜金紫。擢禮部郎中。樞密直學士。會初置審刑院於禁中。命掌之。凡獄具先申本院。付大理刑部斷覆。以聞。又下審刑中覆。裁決以付中書。月餘。權判吏部流內銓。授右諫議大夫。充戶部并度支使。拜御史中丞。詔條奏臺中合行故事。以聞。庶獄皆親臨鞠問。不專委所司。科李繼隆受命河朔。征討不赴。臺辭遣吏追還。

罰俸劾陝西轉運郎文寶生事邊境築城沙磧輕變禁法坐貶
至道二年拜叅知政事入謝諭以中書政本當進用善良博詢
衆議以正道臨之卽怨謗無由生矣後居位頗異恆無所建明
真宗加戶部侍郎坐結交王繼恩貶忠武軍節度行軍司馬咸
平二年起爲殿中少監求面陳邊事機宜不報王均亂命知梓
州改河陽外艱起復奉朝請以風憲領光州小郡就改光祿卿
卒年七十二錄子虞卿試將作監簿兄昌圖國子博士弟晉卿
祕書丞從子紘字仲綱廣東提刑克明之子及第試校書郎
歷知歙於潛剡縣治有惠愛呂夷簡薦改著作佐郎蔡齊舉爲
御史臺推直官拜監察御史奏罷名成都樂工許朝天等遷殿
中侍御史辨皇城司卒誣賈人爲契丹間諜抵罪皇城使王遵
度降官俄判開拆司奏文德殿布政朝會之所每因災異輒聚

緇黃。論議。何以示中外。改鹽鐵判官。歷梓州。陝西。河北。三路。轉運使。遷侍御史。知雜事。言西北久通好。士習安佚。不知戰陣之法。宜擇良將。練精卒。去冗懦。實倉廩。豐財用。爲守禦計。權判流內銓。三司度支副使。使契丹。還除天章閣待制。河北都轉運使。遷刑部郎中。同知通進銀臺司。進龍圖閣直學士。知秦州。卒。紘方介。有吏材。篤於交游。與劉顏爲友。顏死。移任子恩官其子弟。韓起家三班。借職杜衍薦爲閣門祇候。鎮戎軍瓦亭砦都監。積勞至河北。緣邊安撫副使。韓琦薦知保州。改雄州。治兵頗嚴。不事厨傳。遷西上閣門使。卒。贈天章閣待制。

范正辭字直道。齊州人。獲嘉令勞謙之子。治三傳。登第。調安陽簿。開寶中判入等。遷國子監丞。知戎州。改著作佐郎。代還。治淄州。逋欠。運使稱其能。轉左贊善大夫。就知淄州。太宗征河東。杖

殺所部長山吏張秀督民輸不及期一郡畏服改殿中丞通判
棣深二州遷國子博士中丞劉保勲奏充臺直官遷知饒州訟
多滯初至剖決皆盡胥吏咸坐停職會料兵送京師有王興者
憚行以刃故傷其足斬之典妻詣登聞訴召與廷辨對曰東南
繁盛人心未動興敢扇搖苟失控取則臣無待罪之地矣上壯
其言特遷膳部員外郎充江南轉運副使賜錢五十萬有盜劫
饒民甘紹捕繫十四人引問察皆非實真盜密知之皆遁去正
辭單騎出郭二十里追及之按驗伏法繫始得釋端拱二年代
歸改倉部員外時置折中倉令商人先輸米豆酬以茶鹽命監
之改判刑部考功歷戶部鹽鐵二判官通判定揚杭三州真宗
遷膳部郎中召判三司勾院咸平二年爲河東轉運使兼侍御
史知雜事正辭言知梓州李昌齡知壽州董儼運使王德裔楊

絨皆貪墨著聞願罷其政舉吳奮等五人堪任大郡復令奮等各舉縣令從之尋以年老求監兗州商稅卒年七十五子識諷並進士諷字補之初蔭將作監簿獻東封賦遷奉禮郎又獻所爲文召試入等出知平陰會河決水去田失阡陌民訟不能決諷分別疆畔著爲券民不復爭性辨數激昂喜爲聲名操持在已吏不敢欺務存視貧弱至豪猾大家峻法治之遷大理評事通判淄州歲旱蝗甚民以菽可藝而無種諷爲行縣貸發廩菽比秋皆輸還母老改鄆州值李廸被譴留爲治裝祖行詔塞決河差民貧富入芻糲賴以無困徙知廣濟軍水至悉縱筏於官者使護其家仍奏除其租累遷太常博士以疾監舒州靈仙觀結內侍張懷德得薦于太后召還言曹利用驕悍將不可制貶之拜右司諫言玉清昭應災乃天之告戒宜罷脩建置獄時

召百官轉對敕近臣閱視諷奏非陛下親覽則誰肯言其可否
改禮部員外郎兼侍御史知雜事使契丹還擢天章閣待制知
審刑院出知青州再遷戶部郎中山東饑勸宰相王曾家發粟
濟民請遣使安撫入爲右諫議大夫權御史中丞請益漕江淮
米自河陽河陰東下以賑貧困疏論錢惟演仁宗不聽諷自納
告身帝不得已罷出惟演夜中被旨鞠問王文吉告陳堯佐謀
反詰旦得其誣狀奏之復劾宰相張士遜樞密楊崇勳上章懿
皇后諡日中不赴俱罷偶因侍帝語及郭后無子諷言大義當
廢除合帝旨遷龍圖閣直學士權三司使李廵右諷令班狄斐
上諷盛氣凌斐時論非之尋以疾免改翰林侍讀學士符幼祥
源會靈二觀轉給事中出知兗州以常議切大臣多不職復與
執政議事不合罷籍奏諷結納尚美人父繼斌曲爲左藏庫監

吳守則奏課遷官又給言貧假翰林銀器及市齊州官田虧平
估言多不實呂夷簡當諷詭激特貶武昌軍行軍司馬歲中徙
保信軍居舒州母喪服除改將作少監知淮陽軍遷光祿卿知
陝西道改潞州卒諷性曠達排閹圖進不可名檢所與游石延
年劉潛之徒喜豪放居喪飲酒不循禮法後生多效慕號東州
逸黨顏大初作詩刺之姜潛又貽書以疏其過子寬之終刑部
郎中知濠州

王濟字巨川先真定人祖卿有詞辨居趙王谿幕府見谿收衰
懼禍避地深州之饒陽因家焉父恕登後唐童子科開寶中知
秀州盜起城陷被殺將并害濟號慟得免攜父骨逃匿尋謁軍
帥朱乙陳討賊之策嘉其有謀遣以束帛假驛置以遣母先卒
於岳陽權空佛舍併護而歸深州刺史念金鎖一見器之乃以

上聞大祖召見言其年少且俾就學雍熙中自陳死事之孤得
試學士院補龍溪縣簿會輪箭羽主者責鶴翎諭民取鵝翎代
之有豪占陂塘乘旱悉導之分溉民田運使王嗣宗檄問汀州
銀冶訟逮繫數百得其情止坐數人再調昨城尉因嗣宗薦累
遷光祿大理二丞爲刑部詳覆官出通判鎮州牧守多勦舊武
臣倨貴陵下未嘗撓屈戍卒恣暴不法都校孫進使酒無賴且
擒且治一軍畏肅就遷太子中舍詔詳獎勞名判登聞鼓院拜
監察御史疏陳統天下之術節民物之道大者有十擇左右別
賢愚正名器去冗食加俸祿謹政選良將分兵戍脩民事開
仕進其言切於時詞多不載咸平初分預刪定刑統舊條持仗
行劫不論賊有無悉抵死總領張齊賢議貸不得財者濟廷爭
數四人以爲刻改鹽鐵判官車駕巡大名調丁夫脩河馳往經

度還奏以爲勞民省十之六七時方憂河決濟語齊賢此係陰陽災沴宰相苟能爲國家致太平河必不決臣可力保上爲動容又問疆事獻備邊十五策上以其操持不回命權判大理寺與審刑王欽若不相得會福津尉劉瑩坐羣飲杖伶官致死論以大辟欽若奏其故入坐停官逾年復起爲御史通判河南景德初徙知河中有詔緣邊斷橋梁毀船舫稽緩者論以軍法濟謂可惜且動搖民心密奏寢之上嘉歎遣使褒諭未幾召拜工部員外郎兼侍御史知雜事素與內臣裴愈有隙及是坐事力爲辨理三年判司農寺太史奏周伯星見乘間上言唐太宗以豐年爲上瑞臣願陛下日慎一日居安慮危則天下幸甚又與劉綜改定茶法忤用事丁謂等以刑部郎中出知杭州上面加慰諭許密言朝政闕失至則潛復西湖刻白居易舊記石湖之

側民頗利之。睦州有狂僧突入州廨出妖言與運使陳堯佐擒斬之上嘉其能斷祥符三年徙知洪州兼江南西路安撫使歲旱民饑躬督官吏爲糜給之錄饑民爲州兵生活甚衆卒年五十九遺奏進賢退諛罷土木不悉之費平生頗涉經史好讀左氏性剛直無所畏避金鎖託以後事爲撫其孤授真祿仕子孝傑國子博士

呂文仲字子臧新安人南唐錄事參軍裕子登進士補臨川尉遷大理評事掌宗室書奏歸朝授太祝遷少府監丞預脩御覽廣記文苑英華改著作佐郎太宗每御便殿觀古碑刻或文選文仲皆預嘗令讀江海賦獲賜賚充翰林侍讀與書學葛湍同直御書院上暇日從容問以書史雍熙初副王著使高麗還改左正言巡撫福建未幾賜金紫加左諫議大夫淳化中轉關西

巡撫使劾內品方保吉、格克、專幹權、酷威制郡縣、民疲吏擾、變易舊法、太宗怒、亟召保吉將罪之、反爲所誣、罷職、旣而上明其無辜、起直祕閣、兼侍讀、名於崇政殿、讀上草書經史、故實數十軸、模刻于石、遷起居舍人、兵部員外郎、同判吏部銓、知審官院、通進銀臺封駁、司咸平三年拜工部郎中、充翰林侍讀學士、集太宗歌詩三十卷、詔書嘉獎、又知審刑院、六年授御史中丞、景德中命鞠曹州趙諫獄、內出交遊七十餘人、皆士大夫、悉令窮治、因請對言逮捕者衆、慮動外郡、觀聽上曰卿執憲當嫉惡如讐、豈公行黨庇耶、文仲頓首曰中司之職非徒繩糾愆違亦當顧國大體縱使窮治悉得奸狀以陛下慈仁必不盡戮不過廢棄而已今但籍其名置於冗散及舉選之日擯斥之未爲晚也上從其言歷工刑二部侍郎復兼侍讀充集賢院學士卒錄其

子承奉禮部爲人富詞學器韻淹雅久居禁近頗周密兢慎高麗遠俗悅其善於應對清淨無所求後有使者詢其出處有集十卷

孫何字漢公蔡州汝陽人祖益以講授爲業唐末秦宗權據州強以賓佐稱疾不應父庸字鼎臣周顯德中獻贊聖策九篇引唐貞觀所行事以魏徵自况得對言武不可驕欵不可厚吝不可放欲不可極世宗奇其言試補開封兵曹建隆初爲河南簿太平興國六年少卿劉章薦其材改左贊善大夫歷殿中丞知龍州而卒三子俱登進士何十歲識音韻十五能屬文篤學嗜古爲文必本經義在貢籍中甚有聲與丁謂齊名時號孫丁王禹偁雅重之嘗作兩晉名臣贊宋詩二十篇春秋意尊儒教儀聞於時初授將作監丞通判陳州入直史館賜緋遷祕書丞京

西運副歷右正言右司諫真宗初獻五議一請擇儒臣有方略
者統兵二請世祿之家肄業太學寒雋之士州郡推薦而禁投
資自媒者三請復制舉四請行鄉飲酒禮五請以能授官勿以
恩慶例遷上覽而善之咸平二年獻疏六卿分職邦家大柄若
周之會府漢之尚書立庶政之根本提百司之綱紀令僕率其
屬丞郎分其行郎中員外判其曹主事令史承其事四海九州
截然不紊唐之盛時亦不聞別分利權初建使額及玄宗侈心
既萌調發益廣租賦不充於是蕭景楊釗宇文融之徒始開利
孔以構禍階至于肅代叛亂相仍經費不充故盡廢有司之職
用救目前之患五代短促曾莫是思今國家三聖相承五兵不
試太平之業在此時也宜將三部使額還之戶部慎擇尚書一
人專掌鹽鐵領以金部郎中員外侍郎二人分掌度支戶部分

以本曹郎中員外仍命左右司郎中員外總知帳目分勾稽違
職守有常。規矩既定。則進無掎克之慮。退有詳練之名。周官唐
式可以復矣。是冬從幸大名。詔訪邊事。又疏陛下嗣位以來。以
漢祖之大度兼蕭王之赤心。分閫仗鉞者固當以身先士卒。爲
心賊遺君父爲恥。而列城相望。堅壁自全。手握強兵。坐建威
遂使腥羶得計。蛇豕肆行。此殆將帥或未得人。邊奏或有壅
闕。隣境不相救援。檄糧須俟轉輸之所致也。今欲去此四者。一乞
擇將帥於文武之內。參用謀臣。二乞防壅闕。凡奏邊防。陛見延
問。三乞合救援。督以軍令。聽其便宜。四乞備糧。輕齎疾驅。角
競趨捷。今大駕既駐鄴下。敵終不敢萌心南牧。所慮荐食東北
無備之城。不可不慎。上覽而嘉之。俄權戶部判官出爲京東運
副。又獻疏請擇州縣守宰省三司冗員。遞遷法官。增秩益俸。未

幾徙兩浙運副加起居舍人景德初判太常禮院知制誥賜金
紫掌三班院被疾遣醫診視是冬卒年四十四上聞憫惜錄子
言爲大理評事平生樂名教勤接士類後進之有詞藝者必爲
稱揚然性下急不能容物在浙右專務峻刻州郡病焉性好學
著駁史通十餘篇有集四十卷 弟僅字鄰幾少勤學有名解
褐舒州團練推官舉賢良方正策入四等擢光祿丞直集賢院
俄知浚儀縣景德初拜太子中允開封推官賜緋使遼爲國母
生辰使改本府判官遷右正言知制誥賜金紫同知審官院出
知未典軍爲人純厚長者臨政頗寬嘗詔戒飭祥符元年加比
部員外郎代還知審刑院拜右諫議大夫集賢院學士權知開
封改河中進給事中卒年四十九錄子大理評事和爲衛尉寺
丞生平性端慤中立無競篤於儒學士大夫推其履尚有集五

十卷第伯至殿中丞

李及字幼幾范陽人徙鄭州左拾遺覃子登進士調昇州觀察
推官冠華薦其才擢大理丞知興化軍以殿中丞通判曹州奸
民趙諫素無賴持郡短長所爲不道及條上其罪斬於都市擢
知隴州會初置提點刑獄與陳綱同使河北及陝西還判三司
磨勘司出知鳳翔徙延州除三司戶部副使爲淮南轉運使轉
太常少卿知秦州有禁卒白晝劫金釵於市吏執以問及方觀
書召詰實亟命斬之觀書如故將士驚服改左司郎中樞密直
學士遷右諫議大夫勾當三班院尋拜工部侍郎歷知杭州二
州應天河南二府召爲御史中丞卒年七十特贈禮部尚書諡
恭惠及性謹厚清介所治簡嚴喜慰薦下吏而樂道人之善未
嘗有一妄舉惡抗風俗輕靡輟宴游一日月雪出郊獨造孤

山林逋之盧清談至暮而歸居官數年未嘗市吳中一物比去
惟售白樂天集在河南與提刑杜衍間會供具甚薄他日中貴
至亦無加品衍歎其清德

趙積字表微單父人徙宣城爲人誠質寬厚少好學同鄉太府
卿田霖有風鑒妻以女登進士調平定軍判官台州推官改大
理寺丞知崑山通判楚州遷殿中丞知通州召還同判宗正寺
樞密直學士李濟薦爲監察御史遷侍御史判登聞鼓院開封
判官徙開拆憑由司祀汾陰爲留守推官遷兵部員外郎益州
路轉運使真宗諭以蜀遠數亂朕欲聞其利害卿至悉條上之
旣至數言事至一日章數上行部津江縣捕劫盜不得反逮平
民積爲竟其冤悉縱之召爲工部郎中歷侍御史知雜事同判
吏部流內銓糾察在京刑獄與王曾同白知開封慎從吉子鈞

銳受賕事連錢惟演皆坐罷免改三司鹽鐵副使擢右諫議大夫集賢院學士知益州坐度支市蜀錦六千疋不及數以爲不達民情喜自尊大降知同州徙鳳翔京兆二府三遷工部侍郎復糾察刑獄加樞密直學士知并州代還遷刑吏二部侍郎天聖八年擢樞密副使積本結劉美家婢致位政府希望中書會太后崩罷爲尚書左丞知河中府俄拜禮部尚書乞骸加太子少傅致仕卒贈太子太保謚倍質

陳從易字簡夫晉江人登進士歷嵐州團練彭州軍事推官王均反彭人欲殺都監以應從易斬其首謀召餘黨曉以禍福衆皆懾服益厲將士脩城列械賊聞有備不敢入境安撫王欽若以狀聞召爲著作佐郎大理寺詳斷官遷太常博士出知邵武軍預脩冊府元龜改監察御史真宗宴近臣崇和殿召預賦詩

稱旨遷侍御史改刑部員外郎直史館知虔州會大饑有持杖
益民穀者請減死論天禧中坐妄竄太清樓書字降工部員外
以父老求鄉郡寇準惡其疎已除知吉州改福州父喪服除糾
察在京刑獄出爲湖南轉運使徙知荆南擢太常少卿直昭文
館知廣州以清德聞入爲左司郎中知制誥兼史館脩撰與楊
大雅相厚善皆好古篤行博聞強記自景德後文士雕靡相尚
一時學者向之二人獨守不變適朝廷矯文章之弊並進二人
以風天下累遷左諫議大夫進龍圖閣直學士知杭州欽若故
善之數日不見輒忽忽不懌及廢居南京人方畏丁謂獨從易
往見後準貶道州亦以故相事之然以微直少容喜別白是非
多面折人或以尤之卒後所著泉山集二十卷中書制誥五卷

薛田字希稷河東人少師种放與魏野友善登進士起家丹州推官李允正辟爲延州從事向敏中薦其材改著作佐郎知中江縣居父喪會祀汾陰制置陳堯叟奏起通判陝州還拜監察御史母憂又值祀太清宮丁謂起通判亳州遷殿中侍御史權三司度支判官改侍御史益州路轉運副使民間以鐵錢重私爲券以便交易謂之交子富家專其事數致爭訟因請置交子務以權其出入後寇賊用其議蜀人便之就除陝西轉運使進直昭文館知河南復入爲度支副使使契丹還擢龍圖閣待制知天雄軍未幾改知開封以樞密直學士知益州還爲左司郎中知審刑院羌人內寇遷右諫議大夫知延州以疾卒爲人性厚初以幹敏數爲大臣所稱後歷更任使所治無赫赫名寇賊字次公汝州臨汝人母夢神人授珠吞之而娠生而眉目

秀美父早喪鞠於祖母王氏擢進士授蓬州軍事推官設方略擒李順餘黨謝才盛等送京師徙開封推官時施州蠻叛移權領州事戍兵舊仰他郡轉運甚艱至則請募人入粟償之以鹽軍民兩便之又招諭高州刺史田彥伊子承寶入朝爲官族未幾復擒溪南叛蠻首領戮之以白芳子弟數百築柵守險就除大理寺丞遷殿中丞通判河南坐解送諸料失實降監晉州稅起爲太常博士通判并州改監察御史會祀汾陰王嗣宗辟權永興通判專領祠事遷殿中侍御史爲梓州路轉運使晏州多剛縣會斗瑤劫瀘州燒涪井監殺官吏賊趨富順監命部兵多張旗幟趨戎州取公私舟載糧甲令兩路兵至江安誘溪藍順等州刺史及八姓烏蠻首領使斷賊徑給鹽及酒食針梳衣服等付以大榜約大軍至揭榜以別逆順真宗遣崇班王懷信議

攻討招輯之宜。戒奏若不討除。則戎瀝資榮諸彝競起爲患。詔發陝西兵。益以白芳子弟合六千三百人。緣消井監轉鬪。凡十一陣破之。因籍軍之勇悍者千人。分五都以隸禁軍。爲寧遠指揮使。守消井監。更建砦柵。濬三壕以環之。名爲侍御史三司鹽鐵判官出爲河北運使。天禧中。河決澶淵。往視役。隄墊數里。衆皆奔潰。城獨留。自若。須臾水去。衆頗異之。遷工部郎中。三司度支副使。以右諫議大夫集賢院學士知益州。仁宗遷給事中。丁謂敗。徙鄧州。又坐失舉降少府監。知金州。復官。徙滑州總領脩河。平日擢樞密直學士。知秦州。召權三司使。時議茶法。帝訪利害。城以河北兵食皆仰給商旅。若官盡其利。則商旅不行。邊民困於餽運。茶法豈可數更。帝然之。權尹開封。許以妻封邑。回授祖母朝臣。得回封。自城始。太后怒戚里毆妻至死。別其傷。居限。

外事在赦前免之。城頗疎財通音律知術數獨附丁謂恒不自得以至于亡。

李行簡字易從馮翊人家貧刻志於學每至夜分寒暑不易聚木葉學書筆法迥勁與里人楊士元同學又同登進士起家隴州司理叅軍彭州軍事推官陵州富民陳元美父死繼母詐爲父書遷出之累訴不得直劾正其獄改著作郎再遷大常博士知坊州王嗣宗薦爲監察御史王旦數稱其才遷侍御史陝西旱蝗命往安撫發倉粟救乏絕又蜀耀州積年逋租還擢龍圖閣待制帝數臨幸命講周易間訪以大臣各道所長無怨昵人服其長者歷刑部郎中右諫議大夫集賢院學士乾興初改給事中以足疾請外知河中徙魏州卒。

姜遵字從式淄州長山人及第爲蓬萊尉就辟登州司理叅軍

轉開封府右軍巡判官辨出抵死疑獄遷太常博士王曾薦爲
監察御史至殿中侍御史開封府判官與知吉州高惠連有隙
發其贓事按驗無狀降通判延州復入爲侍御史判戶部勾院
利州路饑以爲體量安撫使遷知邢州仁宗卽位徙滑州爲京
東轉運使徙京西未幾以刑部郎中兼侍御史知雜事歷三司
副使右諫議大夫知永興軍爲人長於吏事治尚嚴猛所誅殘
甚衆太后詔營浮屠毀漢唐碑碣代磚甃旣成得召用天聖六
年拜爲樞密副使遷給事中卒贈吏部侍郎

陳瑑字伯玉澶州臨河人登進士歷深陽樂城縣簿太常博士
值曹利用壻盧士倫爲運使聽獄不以直訟者不已付瑑評決
直之御史韓億以聞奏爲監察御史丁父喪哀毀墳木連理憂
除遷殿中侍御史天聖五年郊恩與張錫特疏丁謂因緣險佞

竊據公台賄賂包苴盈於私室威權請謁行彼公朝引巫師妖術厭魅宮闈易神寢龍岡冀消王氣今禋柴展禮渙汗推恩勢必潛輸琛貨私結要權假息遐荒冀移善地夫亂常肆逆將而必誅陰懷姦惡有殺無赦李德裕止因朋黨不獲再還盧多遜曲事王藩卒無牽復帝深然之改三司度支判官遷侍御史歷京西河東河北運副三司戶部度支鹽鐵副使汴倉納糧綱槩最不實操舟者坐亡失所載杖背徒役琰始奏選官監視謂之定計斗面積遷至工部郎中卒

張錫字貺之先京兆人曾祖山甫從唐僖宗入蜀蜀平徙家樊陽錫登甲科由校書郎知南昌以循良稱遷著作郎知新州初建學校教人習進士舉始知勤學轉太常博士監染院詔選能吏治畿縣復知東明始至下令吾所治者三強恃力資恃富刑

侍贖者吾所先也。一時豪勢者屈。善弱者伸。縣以大治。李及薦
爲監察御史。遷殿中侍御史。人以其貌柔而心剛。正號真御
史。俄權三司鹽鐵判官。出爲京湖北路轉運使。歷兵部員外郎。
判度支鹽鐵勾院。爲京東轉運。淄青齊濮鄆諸州人目排河壩
地數起爭訟。命籍其地歲收租絹二十餘萬。訟者始息。改河北
轉運江淮制置發運使。召兼侍御史知雜事。判大理寺權知諫
院。安撫利鹽路。歷度支鹽鐵副使。喪母起復。擢天章閣待制。知
河中。累遷右司郎中。以龍圖閣直學士知滑州。入爲右諫議大
夫。知審官院。進翰林侍讀學士。判太常國子。卒。贈工部侍郎。錫
爲人淳重。清約勤於爲善。雖貴奉養如初。讀書老而彌篤。自經
史子集百家之說。無不記覽。通達初舉。廣文館考官任隨。擢爲
第一。及隨死。無子。屢賜其家。

趙及字希之良鄉人父的事契丹爲蔚州靈丘令雍熙中王師北征乃歸投偃師令因家焉及登進士爲磁州軍事推官徙廣信軍判官改著作佐郎知魏縣徙九隴以母老監葉縣稅歷黃河御河推綱通判青州大名累遷宗正丞屯田員外郎薦爲殿中侍御史劾正夏守恩獄內侍岑守中用賄撓法之罪遷侍御史論夏守贊經略西鄙無功不可復樞府疏罷郭承祐團練使未幾請外知懷與徐州還爲三司戶部判官遷兵部員外郎京東轉運按察使劾知萊州張周物貪暴貶嶺外兼侍御史知雜事數論時政權判吏部流內銓缺至卽勝之吏不得匿以爲市自此相沿爲例遷戶部副使以疾改刑部郎中直昭文館知衛州召爲鹽鐵副使請知汝州徙河中拜天章閣待制右司郎中祀明堂遷右諫議大夫還判大理寺出知徐州疾甚管勾留司

御史臺卒及和厚謙退內行尤篤所治有聲民吏愛之

王璩字及之潁州汝陰人好學能文辭曾致堯稱爲奇士登進士在大理評事歷知舒城會昌二縣通判徐定二州東封還殿中丞知兗州爲監察御史以佐營景靈宮太極觀有勞遷殿中侍御史擢淮南轉運副使召爲三司度支判官與發運司議漕淮南漕渠廢堰以爲無益獨召伯堰謝安爲之人思其功以比召伯不可廢也當以異議降知睦州道復官徙福州閩俗喜格鬪不勝輒食野葛以誣鬪者璩爲辨察詎不得逞又數以火相驚捕訛言者杖之民俗一變仁宗卽位遷提舉在京諸司庫務歷三司戶部度支副使擢龍圖閣待制權知開封謀知奸人僞充皇城司刺事卒以嚇良民取賕黥竄三十餘人都下肅然累遷工部郎中右諫議大夫擢御史中丞建言三司開封諸曹叅

軍及赤縣丞尉率用貴游子弟驕惰不習事請易以孤寒登第更任書考無過者爲之又言在京百司吏人入官請如長定格歸司三年皆可其奏爲人性剛嚴善決事所至綽有風跡未幾卒

王治字聖源館陶人第進士試校書郎歷知彭城新昌宗城三縣改相州觀察推官張知白薦其才擢著作佐郎入爲審刑院詳議官遷太常博士嘗論漢唐之初兵革纔定未暇治邊圉故屈意講和及我力有餘而外侮不止則以兵治之孝武之於外域太宗之於突厥顏利是也宋興七十年而契丹數侵類皆屈已與盟豈久安之策夫善禦敵者必思所以務農實邊之計河北爲天下根本民俗儉嗇勤苦古號豐實今其地十三爲契丹所有餘出征賦者七分而牧監芻地占民田數千百頃是雖有

其七其實賦四分而已。以四分之力。給十萬防秋之師。生民安得不困。且牧監養馬。徒耗芻豢。未嘗獲用。請擇壯者配軍。衰者徙之河南。孳息者養之。民間罷諸坳牧。以其地爲屯田。發役卒。刑徒耕之。歲可獲穀數十萬斛。又言漳水一石。其泥數斗。古以爲利。今以爲害者。繫乎用與不用。爾願募民復十二渠。渠復則水分。水分則無奔決之患。以之灌溉。可使數郡瘠鹵之田。變爲膏腴。如是。則民富十倍。而帑廩有餘。以此馭敵。何求不可。帝詔河北轉運規度判官。治州王軫言。漳河岸高水下。未易疏導。又其流濁。不可溉田。沿方遷監察御史。上書駁軫語。在河渠志。嘗劾知開封陳堯咨判官張宗晦。嘗酒惰事。天聖五年。安撫關陝。減諸縣秋稅十二三。還爲開封推官。差體量河朔饑民所至。發官廩以賑。就除轉運副使。上言。本朝制兵。聖刑未幾於古。請教河

北強壯以代就糧禁卒之闕罷招廂軍以其冗者隸屯田行之
數年禁卒當漸銷滅而強壯悉爲精兵矣頃多以教處罪多重
於律如以絹估罪者教以絁代之坐髡鉗而役者教黥竄以爲
卒比諸州謫卒太多衣食不足誠願削深文用正律以春秋法
斷事庶無冤濫被詔鞫曹汭獄多傳致之遷殿中侍御史親喪
服除改工部員外郎知邢州爲河北轉運使始奏罷二牧監以
地賦民導相衙邢趙水下天平景祐諸渠溉田數萬頃因詣闕
奏事上所著春秋集十五卷授直昭文館歷三司戶部鹽鐵副
使遷兵部員外郎天章閣待制陝西都轉運使俄因朝例減戍
卒就食內地者數萬密院李諮以爲不可降知滑州徙成德軍
建學校行鄉飲酒禮遷刑部郎中河東都轉運使加龍圖閣直
學士知并州時元昊數寇建議徙豐州不報已而果陷進樞密

直學士涇原路經略安撫招討使改涇州觀察使坐葛懷敏敗
降天章閣待制未幾徙知成德軍終河中府有文集二十卷唐
志二十一卷 子鼎字鼎臣登進士累遷太常博士王堯臣薦
勾當三司公事數上書論時政擢提點江東刑獄與轉運楊紘
判官王綽號爲三虎降知深州有告州卒與其徒謀以元日殺
軍校劫庫兵應王則反者捕首謀十八人一郡帖然大饑人相
食鼎經營賑救徙建州提點河北刑獄召爲開封鹽鐵二判官
累遷司封員外郎淮南兩浙荆湖制置發運副使俄以爲使鼎
精于吏職事無大小必出於已凡調發綱吏悉度漕路遠近定
先後爲成法均節勞逸吏不能爲重輕入爲三司鹽鐵副使遷
刑部郎中天章閣待制河北都轉運使徙河東卒鼎爲人廉直
不欺當官明敏不可撓以私事繼母教孤姪慈孝交至自奉儉

約與弟豫皆有材氣豫爲人不事勦檢亦好上書言事仁宗以爲孟浪鼎所言多可用後爲大理寺丞知伊闕縣有異政棄官浮游江湖殖貨自給以卒

施昌言字正臣通州靜海人進士高第授將作監丞通判滁州遷屯田員外郎知太平上政論三十篇入爲殿中侍御史開封判官撫淮南還以禮部員外郎兼侍御史知雜事遷三司度支副使除天章閣待制河北都轉運使有言濱棣等六州河淺可涉宜爲城守以待契丹詔與宦官楊懷敏往視言六州地方千里又河數移徙城之甚難而無利况契丹未渝盟乃先自困非便或又請麟府立十二砦以拓境詔復與明鎬張元度可否昌言獨以爲麟府在河外於國家無毫髮入而至今餽守者徒以畏威國虛名耳今不當又事無利之砦以重困財力就除知慶

州在州所爲不法降知華州歷滄州河陽移河北都轉運使議
塞商胡決河累與留守賈昌朝爭論徙江淮發運使加龍圖閣
直學士知應天府徙延州召還會塞六塔河以爲都大脩河制
置使辭弗許加樞密直學士知澶州以便役事河復決奪一官
知滑州改杭州加龍圖閣學士以老求罷改越州卒

弘簡錄卷一百四十二

明刑部員外郎仁和弘齋邵經邦學

皇清翰林院侍講學士四世孫遠平校閱

臺諫 宋五之三

魯宗道

子有開

孔道輔

祖宜父易子宗翰

孫祖德

郭勸

段少連

楊偕

蔣堂

從子奇

鞠詠

劉隨

曹脩古

弟修睦

滕宗諒

劉鉞

方偕

何郊

孫朴

呂景初

馬遵

吳中復

從孫擇仁

高若訥

沈邈

魯宗道字貫之亳州譙人少孤鞠于外家自奮讀書以文謁戚
綸器之登進士爲定遠尉調海鹽令縣東南舊有港導海水至
邑下歲久湮塞發鄉丁疏治之人稱其利號魯公浦改歙州軍

事判官遷祕書丞陳堯叟辟通判河陽天禧元年真宗詔兩省
置諫官六員不兼他職考所言爲殿最首擢宗道與劉曄爲右
正言凡諫章由閣門進宗道請面論事而上奏通進司遂爲故
事嘗言守宰去民近今除一州補一縣無以區別能否故天下
親民者黷貨害政十常二三欲裕民而美化不可得矣漢宣帝
除刺史守相必親見而考察之今縱未暇親見宜令大臣延之
中書詢考以言察其應對設之以事觀其施爲才不肖皆得進
退之任吏部者一皆放此庶得良守宰以宣助聖化帝嘉納之
自此凡有風聞多所諭列久之帝意頗厭其煩宗道因對自訟
曰陛下用臣豈徒欲事納諫之名耶臣竊恥尸祿請得罷去帝
撫諭良久尋除戶部員外郎仁宗升儲歷左右諭德直龍圖閣
嘗微行酒肆中就飲偶帝亟召使者及門入宗道方望使者先

入約曰。卽上怪公來遲。何以爲對。曰。第以實言之。使者曰。倘得罪。奈何。曰。飲酒人之常情。欺君臣子大罪也。真宗果問使者具以所言對。帝詰之。謝曰。有故人來臣家。食什物不具。故就酒家飲。帝更以爲忠實。可大用。嘗以語太后。至后臨朝。遂大用。遷戶部郎中。龍圖閣直學士。兼侍講。判吏部流內銓。久患銓格煩密。多所釐正。又知吏所以爲奸狀。悉揭科條。廡下人以爲便。雷允恭擅易山陵詔。往按視。還拜右諫議大夫。叅知政事。章獻太后臨朝。問宗道曰。唐武后何如。主對曰。唐之罪人也。幾危社稷。后默然。有請立劉氏七廟者。太后問輔臣。衆不敢對。宗道抗言。若立劉氏七廟。如嗣君何。帝太后同幸慈孝寺。欲以大安輦先帝行。宗道曰。夫死從子。嬪人之道也。太后遽命輦後乘輿。時執政多任子於館閣。讀書。宗道曰。館以育天下英才。豈執祿子弟得。

以恩澤處邪樞密使曹利用恃權驕橫宗道屢於帝前折之自
貴戚用事者皆憚之曰爲魚頭參政因其姓且骨鯁如魚頭也
再遷禮部侍郎充祥源觀使凡在政府七年務抑僥倖不以名
器私人疾劇帝臨問賜白金卒年六十四皇太后臨奠之贈兵
部尚書宗道性剛正疾惡少容遇事敢言不爲小謹太常議謚
剛簡復改肅簡議者以肅不若剛爲得其實 子有開字元翰
好禮學通左氏春秋蔭知韋城縣曹濮劇盜橫行聞其名不敢
入境改知確山興廢陂溉民田數千頃有大姓把持吏長短有
開治其最甚遂以無事蔡守富弼薦爲有古循吏風擢知金州
天方大旱適蠱獄數十人當死有開謂畜蠱者未必謀于衆訊
之果誣白而遂雨移知南康軍嘗對言王安石新法初行未見
其忠當在異日言綏而切安石惡其立異左遷杭州通判俄知

衛州水災貸民常平錢粟悉蠲其息徙冀州增隄浚防豫備不虞或謂未嘗有患不聽卒成之明年河決果得無害民遷誦功狀名爲繕部郎中元祐中歷知信陽軍洛滑二州復守冀官至中大夫卒

明曰父爲直臣子爲循吏一門之中有光盛治

孔道輔字原魯初名延魯夫子四十五代孫祖宜乾德中詣闕上書述其家世詔爲曲阜主簿歷黃州軍事推官遷司農寺丞掌星子鎮市征建言其地當江湖之會商賈所集請立以爲縣從之就命知縣事後徙知南康軍代還獻文賦數十篇太宗覽而嘉之遷右贊善大夫襲封文宣公父勗進士及第爲太平推官有治行遷殿中丞通判廣州以清潔聞被召之日蕃餽爭持寶貨來獻皆慰遣之真宗東封躬詣孔子祠問宰相孔氏今孰

有名欽若以勛對卽召爲太常博士知曲阜縣擢御史臺推直
官累遷祕書監分司南京管勾祖廟久之以工部侍郎致仕卒
年八十九道輔幼端重登進士爲寧州軍事推官與州將數爭
事時尚祥瑞有蛇出天慶觀眞武殿中郡以爲神州將率官屬
往拜之欲上其事道輔徑前以笏擊蛇碎其首觀者大驚其後
莫不歎服遷大理寺丞知仙源縣主孔子祠事子孫有放縱者
一繩以法上言廟制卑陋請加脩崇詔可遷太常博士仁宗時
太后召爲左正言廷奏曹利用羅崇勲竊弄威柄宜早斥去以
清朝廷立對移刻未有旨道輔立不動太后可其奏乃退未幾
直史館判理欠憑由司奉使契丹道除右司諫龍圖閣待制契
丹宴使者有優人像其祖以爲戲道輔赧然徑出主客者邀之
還坐且令謝道輔正色荅曰中國與北朝通好以禮文相接今

俳優之徒慢侮先聖而不之禁其過在北朝道輔何謝契丹君臣默然又酌以大卮謂曰天方寒飲此可致和氣辭曰不和固無害既還言者以爲生事上面質其故對曰平時宋使至輒爲所侮若不與較恐益慢中國帝然之歷判吏部流內銓糾察在京刑獄坐糾事不當出知青州還遷兵部員外郎復出知許州明道二年召爲右諫議大夫權御史中丞會郭后廢率臺諫孫祖德等十人詣垂拱殿伏奏皇后天下之母不當輕議廢紉願賜對盡所言帝使內侍傳諭同至中書令宰相呂夷簡告以皇后當廢之狀道輔語夷簡曰大臣之於帝后猶子事父母也父母不和可以諫止奈何順父出母乎夷簡曰廢后有漢唐故事復曰人臣當導君以堯舜豈得引漢唐失德爲法耶夷簡不荅卽奏言伏閣請對非太平美事乃出道輔知泰州餘坐罰贖歷

徐究二州後三年復原職道輔性鯁直再執朝憲遇事彈劾益無所避風采蕭然會有獻詩百篇請投龍圖閣直學士上曰是詩雖多不如孔道輔一言卽以命之在朝皆知前坐出非上本意然權貴益忌之初道輔與其父儵里中郭贊舊宅居之有言於帝以爲家近太廟出入傳呼非所以安神靈詔令他徙集賢校理張宗古言漢內史府在太廟垣垣中國朝亦有官私第舍在廟垣下似不須避帝出宗古通判萊州道輔歎曰儵人之言入矣會受詔鞠馮士元獄事連參政程琳帝有不悅意宰相張士遜素惡琳并疾道輔不附已將逐之語道輔曰上顧程公厚今爲小人所誣見上爲辨之道輔入對言琳罪薄不足深治帝怒責以朋黨大臣出知鄆州已而知爲士遜所賣頗憤惋時大寒上道行至韋城發病卒天下莫不以直道許之皇祐三年上

因王素入對語及道輔慨然思其忠特贈工部侍郎 子宗翰
字周翰登進士知仙源縣爲治有條理遇族人有恩義不以私
故執法王珪司馬光薦之由通判陵州爲夔峽轉運判官提點
京東刑獄知虔州城濱章貢兩江歲爲水齧宗翰大伐石爲址
治鐵鋼之屹然牢固詔書褒美歷陝揚洪兗四州皆以治聞哲
宗初上書闕下時應詔以千數獨宗翰與王鞏爲司馬光所獎
名爲司農少卿遷鴻臚卿言國朝崇禮先聖賜子孫世襲公爵
然皆兼領他官雖有奉祀之名實違守廟之義請自今應襲封
者終身居鄉不改詔從之更衍聖爲奉聖公不領他職給廟學
田萬畝賜國子監書立學官以誨其子弟進刑部侍郎以寶文
閣待制知徐州卒

弘簡錄 川曰直道而行世傳家法當時帝后同臻累洽呂相挾私

張宰負諾九原千載此寧彼作

孫祖德字延仲濰州北海人父航爲監察御史擢淮南轉運使

祖德進士及第調濠州推官校勘館閣書籍

時校勘不爲常職黜而去改

大理寺丞知榆次縣上書言刑法重輕以屯田員外郎通判西

京留守司方冬苦寒詔罷內外工作錢惟演督修天津橋格詔

不下祖德白罷其役入爲殿中侍御史遷侍御史上章請太后

還政后崩擢兵部員外郎兼起居舍人知諫院久之遷天章閣

待制宦官閻文應獻計三司判官許中以藥化鐵成銅可鑄錢

以裨國用祖德固爭曰國朝法禁僞銅而官自爲之是教民欺

也出知兗徐蔡州并永興軍徙鳳翔置鄉兵以禦寇改龍圖閣

直學士知梓州累遷右諫議大夫知河中歷陳許潞鄆亳州應

天府以疾得請州除吏部侍郎致仕卒在官率少清約有論事

七卷子珪江東轉運使

郭勸字仲褒。鄆州須城人。祖寧。萊陽令。勸登進士。授寧化軍判官。累官太常博士。通判密州。遷屯田員外郎。梓州路轉運判官。母老。固辭。復爲博士。通判萊州。州民霍亮爲仇人誣罪死。吏受賕。傅致勸爲辦理。得免。擢殿中侍御史。歷言知應天宋綬有辭學。知荊南杜衍清直不宜處外。錢惟演窮惟濟不宜營遷留後。胡則罷三司不宜仍擢工部侍郎。請收召綬衍而罷惟濟。兵權追則除命。勸坐謫。監維州稅。遷祠部員外郎。知萊州。月餘復爲侍御史。判三司鹽鐵。勾院會議。納陳氏女爲后。極言家正而後天下治。當自后妃始。郭后未聞有大故。陳氏未聞有世閔。疏入。得寢。改兵部員外郎。兼起居舍人。同知諫院。言致仕所以待賢者。今馬季良乃負罪貶黜之人。請求致仕。乞追還誥敕。發運使

劉承德獻輪扇浴器以媚上請付外毀之以戒邪佞不報爲趙元昊官告使僞遣悉拒不受還兼侍御史知雜事權判流內銓遷工部郎中度支副使天章閣待制出知延州元昊將山遇率其族來歸勸與鈴轄李渭議奏卻之是冬元昊反議者歸罪於勸不當絕其使落待制移知齊湊磁三州元昊益侵邊關陝擾攘復降兵部員外母憂起復知鳳翔尋復待制召權戶部副使以龍圖閣直學士知滑州再遷兵部郎中徙滄州又徙成德軍盜起甘陵徙鄆州韓琦言勸所遣將張忠劉遵平賊功皆第一特詔獎諭未幾召爲翰林侍讀學士復判流內銓改左諫議大夫權御史中丞遷給事中請贈其祖爲祠部員外衛士有陰置刃衣篋中入禁門皇城司楊景宗不以聞請先治景宗罪祀明堂將加恩中外就齋次率御史極論復爲侍讀學士同知通進

銀臺司性廉儉居無長物嘗稱顏魯公語生得五品服任子爲齋郎足矣及再爲侍從語諸子曰自起諸生今年七十可以歸矣章三上不得謝賜銀使市田宅後三年卒子源明治平中爲太常博士命補呂誨等闕爲監察御史裏行不受請還誨等後以職方員外郎知單州卒

段少連字希逸開封人生時母夢鳳集于庭及長美姿表倜儻有議度舉服勤詞學科試校書郎知崇陽縣能繼張詠風迹權杭州觀察判官預校道經改著作佐郎歷祕書丞知蒙城名山金華三縣入爲審刑院詳議官辟張士遜江寧通判還爲御史臺推直官遷太常博士以論劄從德濫恩謫監澠水軍酒稅未幾通判天雄軍太后崩召爲殿中侍御史會孔道輔等爭廢后事伏閣少連疏言陛下親政以來進用直臣開闢言路天下無

不歡欣鼓舞竊以伏閣上疏自古有之如唐陽城王仲舒崔元
亮前史皆爲美談今道輔等所言陛下審以爲阿黨乎爲忠亮
乎若果以大故黜后則當上告宗廟傳示天下何必特示涵容
置之別館爲后爲妃安所取信矧今創艾之餘必能痛自脩省
誠願詔復位號杜絕非間待之如初則天地以正陰陽以和人
神共懽豈不美哉不報未幾除開封判官歷刑部員外郎直集
賢院三司度支判官出爲兩浙并淮南運副兼發運司事所至
自閱簿書槪其違理者按之部屬有過許令自新吏亦不敢欺
秀州有無罪人死僞爲罪款少連一覽輒得人驚以爲神改兵
部員外郎徙陝西劾奏駙馬柴宗慶縱恣下皆服罪入兼侍御
史知雜事河東地震率使安撫還爲工部郎中天章閣待制知
涇州元昊反范仲淹薦以堪任將帥遷龍圖閣直學士知涇州

改渭州卒爲人通敏有才每遇訟者事無大小一言處決咸當
于理不爲權勢所屈仁宗歎惜之

楊偕字次公唐僕射於陵六世孫父守慶仕廣南劉氏歸朝爲
坊州司馬因家中部偕少從种放學登進士授坊州軍事推官
知沂源再調漢州軍事判官數上書論時政又上所著文論改
采典軍節度推官論陝西邊事遷著作佐郎審刑院詳議官至
太常博士宋綬薦爲監察御史改殿中侍御史屢以言罰金貶
監郢州稅陞祠部員外郎知光州改侍御史兼知雜事俄判吏
部流內銓徙三司度支副使天章閣待制河北轉運使按知定
州夏守恩犯賊流嶺南母憂起復進龍圖閣直學士知河中元
吳反夏竦請增置土兵易戍兵歸衛京師偕言關中財用方困
復增土兵徒耗國用今賊勢方盛雖增土兵亦未能減戍兵第

竦懼敗事欲以兵少爲解爾徙陝州議立陝西五保偕亦以爲擾民而止轉河東都轉運使時大選三路民兵偕復議方今兵不爲少徒多而不練故其勢易敗其立論多類此進樞密直學士知并州奏出師臨陣紀律爲上今詔選強壯萬人策應麟府所發皆農卒慮在路逃逸及臨陣退縮請嚴立軍法從之前帥優遇中官監軍者并人畏其橫偕至一繩以法命率所部兵從副總管赴河外或有捧檄訴者叱曰據法違命當斬衆驚怖汗下自此軍政肅然元昊掠河北詔脩寧遠砦偕以爲無泉可守請建新麟州於嵐州白塔地建砦屯兵具陳遷有五利不遷有三帝以咸平中麟州嘗經寇兵攻圍不可守語輔臣諭偕速脩寧遠以援麟州明年改左司郎中本路經略安撫招討使賜錢五十萬偕復列上六事亦不從罷知邢州徙滄州求而論兵

事召還入對論八陣圖及進神機劈陣刀其法外環以車內比以楯帝命以步卒五百如其法布陣于庭善之乃下諸路其後王吉果用以勝元昊於兔毛川久之遷翰林侍讀學士知審官院適元昊乞和而不稱臣偕以連年耗費宜權許之諫官王素等劾其助賊不臣之請出知越州道改杭州上太平可致十象圖還判太常并司農寺改右諫議大夫以工部侍郎致仕卒遷奏兵論一篇贈兵部侍郎偕性剛而朴敢爲大言數論天下事議者頗以爲迂與人寡合喜古今兵法有兵書十五卷文集十卷子忱慥皆有雋才蚤卒

蔣堂字希魯宜興人好學工文辭擢第爲楚州團練推官遷大理寺丞知臨川發富人李甲不法事置死歷判眉許吉楚州以太常博士知泗州召爲監察御史再遷侍御史判三司度支勾

院出爲江南東路轉運使徙淮南歲薦部吏三百人或謂其太多堂曰願十得二三亦足報國矣坐失按蘄州王蒙正降知越州奏復聚石所侵鑑湖之地徙蘇州入判刑部徙戶部勾院歷度支鹽鐵副使安撫梓夔路擢天章閣待制江淮制置發運使先是運使上計造大舟數十載江湖物入遺權貴堂曰吾豈爲此歲入自可附驛奏也前後五年未嘗一至京師就除河東都轉運使未行知洪州改應天累遷左司郎中知杭州以樞密直學士知益州慶曆初詔天下建學因廣文翁石室爲宮選屬官以教諸生士人翕然稱之在任節遊宴減厨傳尚寬縱頗變楊日嚴之政或以爲私官妓徙河中府以禮部侍郎致仕卒贈吏部侍郎堂清修純飭遇事毅然不屈貧而樂施延舉晚進至老不倦嘗作詩有吳門集二十卷從子之奇字頴叔初蔭入官

舉進士又中春秋三傳至太常博士盛言歐陽脩漢議之善擢
監察御史神宗轉殿中侍御史上謹始五事進忠賢退姦邪納
諫諍遠近習聞女謁帝皆納之復懼不爲衆論所容以閤昧事
劾脩事下中書問狀無實貶監道州酒稅改宣州新法行爲福
建運判時諸道免役推行失平之奇爲約僦庸費隨算錢高下
均取之民以爲便遷淮東運副歲惡民流之奇募脩水利用工
百萬溉田九千頃活民八萬餘歷江西河北陝西所至節損賦
入以給公私月度比去遺錢粟皆支二年擢江淮荆浙發運副
使元豐六年漕粟至北京歲溢六百二十萬石賜三品服請繫
龜山左射至洪澤爲新河以避淮險自是無覆溺之患詔增三
秩直龍圖閣升爲他凡六年其所經度皆爲定準元祐初進天
章閣待制知潭州改集賢殿脩撰知廣州擒妖人岑深加賀文

閣待制建十賢堂祀前守吳隱之宋璟盧奐李勉以下徙河北
都轉運使知瀛州入爲戶部侍郎未幾復知熙河夏人請畫封
境之奇揣其非誠心務嚴守備謹烽堠常若敵至終任不敢犯
紹聖中嘗陳紹述復官職召爲中書舍人知開封進龍圖閣直
學士兼侍讀元符末坐鄒浩累責守汝州徙慶州徽宗拜翰林
學士同知樞密院明年知院事遣將討沅州蠻卽其地建徽靖
二州崇寧初除觀文殿學士知杭州論棄河湟事奪職降中大
夫以疾罷祠歸卒年七十四凡爲部使者十二六典會府皆以
治辦稱且孜孜薦進人物若處士陳烈孝子徐積每行卽必造
之特以脩故爲清議所薄

鞠詠字詠之開封人父勵膳部員外至廣南轉運使早卒詠方
十歲好學自立登進士試校書郎知錢塘改著作郎知山陰除

太常博士召爲監察御史錢惟演自亳來朝闕入相詠言其儉
險若逐相之必失天下望太后遣內侍持奏以示猶顧望不行
詠語諫官劉隨若相惟演當取白麻壞之惟演聞之始亟去時
大安殿柱生芝帝召羣臣就觀詠言皇上新卽位河決未塞霖
雨害稼宜思所以應天變臣願陛下以延進忠良退斥邪佞爲
寶以訓勸兵農豐積倉廩爲瑞草木之怪何足尚哉詠嫉王欽
若阿附數貶其短欽若心思之至是復相會詠兼左巡使坐失
糾率府率崇俊入朝失儀出通判信州又坐劾陳絳獄失實徙
邵州欽若死中丞王鞏奏還轉殿中侍御史曹利用貶所薦擢
多領兵守邊朝議欲罷去之詠請一切毋治河北京師旱饑請
出太倉米十萬石以賑改三司鹽鐵判官至副使天聖六年夏
大星晝墮有聲如雷詠條上五事因言少保晁迥雖老致仕有

器識宜蒙訪對必有裨補三司使胡則言詠有黨性貪巧不可
任利權轉禮部員外郎兼侍御史知雜事權判吏部流內銓八
年置天章閣待制命詠爲之判登聞檢院故相張士遜入覲冀
得再用詠奏與利用相親共事援引爲相憑寵肆威無所救正
願陛下割東宮舊恩伸朝廷公義士遜乃赴鎮晚年多病嘗著
道釋雜言數十篇別構淨室以居自號深寧子卒

劉隨字仲豫開封考城人及第爲永康軍判官西南夸市馬苦
吏誅索隨爲按治僉人德隨以父呼之屬縣令受賕需獄轉運
李士衡屬隨爲之地隨不從士衡奏隨苛刻罷歸冀人聞之數
百奔訴事聞改大理寺丞李溥賊敗事連權貴有司希旨不治
隨再疏劾之悉抵罪以晁迥薦通判益州人服其明見號水晶
燈籠呂夷簡復薦入爲太常博士改右正言數月坐較開封府

士失察降監濟州稅連徙通晉二州還朝遷右司諫數言今之所切在於納諫其餘守常安靜而已而頻年水旱咎在執事大臣忿爭不和請察王欽若等所爭爲辨曲直又因星變言國家本支蕃衍封策未行望擇賢者用唐故事增廣嗣王郡王之封以慰祖考有詔選蜀中優人補教坊隨言此賤工不當辱詔命又劾鍾離瑾不當納奇花怪石於禁中欽若不當塑像茅山列於仙官宜察其妄又言李維以詞臣求換武職非所以勵廉節前後所論甚衆帝益明習天下事隨請太后歸政軍國常務專稟帝旨又諫太后不宜數幸外家以此忤太后意請外改起居郎出知濟州久之遷刑部員外郎入兼侍御史知雜事疏言比者庶官僥倖請託或入對之際涕泗祈恩或績效甚微銜鬻要賞亦有藩翰之臣位尊職重表章不遜請求靡厭按察之司燕

安觀望以容奸爲大體以舉職爲近名以巧詐爲賢以恬退爲拙貪殘者瀆于貨財老疾者不知止足請行申儆之法朝廷爲下詔戒飭中外未幾同判流內銓以長定格從事吏不得爲奸改三司鹽鐵副使使契丹有司劾其足疾奪一秩出知信州徙宜州再遷工部郎中知應天府召爲戶部副使天章閣待制卒生平臨事明銳敢行與孔道輔曹修古皆以清直聞帝憐其家貧賜錢六十萬

曹修古字述之建安人與弟修睦同舉進士有聲累遷祕書丞通判饒州宋綬薦其材擢監察御史首上四事行法令審故事惜材力辨忠邪辭甚切至次言唐貞觀詔令致仕官班本品見任上欲其知耻而勇退也比有年餘八十尚任班行心力旣衰官事何補請明詔凡年七十以上許令自陳優遷官秩因著爲

令時上優禮言官修古奏內侍行馬不避立命笞之又奏晏殊
身任輔弼百僚所法而以笏擊人折齒忿躁若此亡大臣體請
付按察以伸公議又言司天苗舜臣等嘗言土宿留參太白晝
見及詔日官考定希旨悅上以爲土宿雖留順不相犯太白雖
見日未過午其言未足爲信臣恐自此人皆倣效媚悅取容以
災爲福天變不告所損至大時宮中以翡翠羽爲服玩詔市之
於南越修古言物命至重昔真宗禁採玃毛皆有故事乞命罷
之又諫崇建塔廟議營金閣費皆不貲宜亟賜罷不報出知歙
州改南劔復爲開封判官歷殿中侍御史刑部員外郎知雜事
同判吏部流內銓與楊偕郭勸交論太后兄子劉從德怙恩錄
姻戚廝役幾至八十人馬季良錢暖緣遺奏超授清秩太后怒
命削一官判杭州未行改知興化軍會赦復官卒修古直諫屢

慨有風節當太后臨朝時權倖用事人懷顧忌脩古獨遇事敢
言無所回撓家貧不能歸葬賓佐賻之以錢季女泣白其母曰
奈何以是累吾先人固拒不納太后崩帝思其忠特贈右諫議
大夫賜錢二十萬無子錄其壻劉勲試將作監簿 修睦亦廉
介自立累官都官員外郎知邵武軍杜衍薦爲侍御史改司封
員外出知壽州徙泉州坐失舉奪一官後知吉州上書請老分
司南京致仕卒

滕宗諒字子京河南人登進士爲泰州軍事推官范仲淹稱其
才召試學士院改大理寺丞知當塗邵武三縣遷殿中丞與祕
書丞劉鉞上疏本朝以火德王伏見掖庭遺燼延熾宮闈火失
其性由政失其本詔書亟下引咎滌瑕中外莫不感動然而詔
獄未釋鞠訊尚嚴恐違上天垂戒之意累兩宮好生之德祥符

中宮掖火先帝悉寘之法若防患以刑而止豈復有今日之虞哉誠願脩政以禳之思患以防之凡逮繫者特從原免疏奏詔罷推究復固請太后還政不報后崩擢嘗言還政者選爲左正言轉左司諫嘗言上體多疾由內寵所致陛下日居深宮流連荒宴臨朝之際羸形倦色決事如不掛懷語切直降祠部員外郎知信州又坐與范諷善降監池州酒久之通判江寧徙如湖州元昊反除刑部員外郎直集賢院知涇州葛懷敏敗諸郡震恐宗諒易戎服乘城招募勇敢諜知寇遠近及其形勢檄報旁郡使爲捍衛會仲淹自環慶引蕃漢兵來援遇天陰晦人情憂沮宗諒大設牛酒迎犒士卒又籍定州戰沒者祭於佛寺厚撫其孥使各得所邊民稍安仲淹薦以自代擢天章閣待制徙慶州御史梁堅追劾前費公錢十六萬遣中使檢視適仲淹參政

力救之降一官知虢州中丞王拱辰復論徙岳州轉蘇州卒爲人頗尚氣倜儻自任好施與沒後家無餘財所蒞喜建學湖州最盛學者傾江淮間有諫疏二十餘卷 劉鉞字子長大名人少孤貧有學行登進士知襄城固始二縣有能名先宗諒卒贈右司諫官其一子賜錢十萬恤其家

方偕字齊古莆田人登進士爲溫州軍事推官歲饑詣提刑呂夷簡請早募就廩逌則將聚爲盜凡籍爲軍者七千人徙汀州判官權知建安縣境產茶每先社日所在令民鼓譟山旁以達陽氣遷著作佐郎歷福清資陽二縣轉屯田員外郎爲御史臺推直官澧州有逃卒傭民家誣告其民事摩駝神歲殺十二人以祭逮獄已久偕令疏所殺主名皆亡狀事白坐逃卒以死龐籍薦爲御史裏行遷侍御史南京鴻慶宮災引漢罷原廟故事

請勿復脩元昊寇塞門。鄜延副總管趙振逗撓不出。當斬。詔偕往按還。奏兵寡不敵。出卽餌賊無益。因得不死。尋爲開封判官。江南安撫使。奏罷三司歲出香綺下州郡配民者。更鹽鐵判官。遷兵部員外郎兼侍御史知雜事。判大理寺改度支副使。擢天章閣待制。江淮制置發運使出知杭州。遷刑部郎中有能聲。喜飲酒。以太常少卿分司。西京遷光祿卿卒。

何郊字聖從。本陵州人。徙成都。第進士。由太常博士爲監察御史。轉殿中侍御史。論事無所避。帝嘗問古有碎首諫者。卿能之乎。對曰。古者君不從諫。則臣碎首。今陛下受諫如流。臣何敢掠美而歸。過君父。帝欣納之。因論王拱辰罷三司營求經筵乞正其罪。又論石介實死。夏竦乃譏其詐。楊懷敏衛卒致亂。猶爲副都知。仁宗召郊論曰。懷敏實先覺。宜寬假。郊言不可卒出之。竦

倡張貴妃之功諫官王貲陰爲妃地冀擢中宮言賊本起於后
閣請究其事帝以語鄴奏謂此奸人之謀乃止不究竦得罪出
知河南遷延不去乞留京師鄴又奏佞人在君側爲善政累願
勿易前命竦始行時詔陳左右朋邪中外險詐久無所行鄴請
閱實其是否不可以一臣詐而疑衆臣一士詐而疑衆士且擇
官者宰相之職今用一吏則疑其從私故細務或勞於親決分
閫者將帥之任今專一事則疑其異圖故多端而加之羈制博
訪者大臣之體今見一士而疑其請託棄征者仕進之常今出
一言而疑其朋黨君臣交疑而欲天下無否塞之患不可得矣
又言都知王守忠以脩祭器微勞遷景福殿使不宜先給留後
奉既守忠移閣門欲以本品坐宴殿上鄴極論祖宗舊制未有
內臣坐殿上者此弊一開所損不細守忠遂不敢赴適知雜御

史闕執政欲進其黨帝以郟不阿權勢越次用之通歷三院
有直聲晚節頗回易因地震言君弱臣強以譏切韓琦又乞召
還王洵以迎合上意聲名損於先時因母老求歸加直龍圖閣
知漢州將行願上處張堯佐如李用和但富貴之而不假以權
倘能堯佐則傷恩黜言者則累德均爲不可尋進集賢殿脩撰
知梓州擢天章閣待制還判銀臺司治平中遷龍圖閣直學士
河東都轉運使劾故相梁適帥太原病不能事鈐轄蘇安靜怙
寵不法郟歷知永興河南老病猶乞進用神宗薄之詔提舉玉
局觀從臣外祠自此始以尚書右丞致仕卒年六十九

孫朴字夢得眉山人六世祖長孺喜藏書號書樓孫氏登第以
大理評事通判絳州召試學士院除太常丞直集賢院爲開封
推官判三司開拆司同脩起居注以右正言知制誥遷起居舍

人翰林侍讀兩學士史館脩撰累遷吏部郎中久處顯要泊如也皇祐中以右諫議大夫權御史中丞篤厚寡言人以爲長者韓絳論抃非糺繩才抃卽手疏臣觀方今士人趨進者多廉退者少以善求事爲精神以能訐人爲風采捷給若晉夫謂之有議論刻深若酷吏謂之有政事諫官所謂才無乃是乎若然臣誠不能仁宗察其言趣視事在臺數敢言不爲矯激都知王守忠領武寧軍節度抃奏罷之劉沆爲溫成后護喪葬且議間建陵立廟抃言其非禮率官屬固爭不能得伏地不起帝爲改容遣之又奏梁適在相位上不能平持權衡下不能篤訓子弟言官數論奏未聞報可恐無以慰物論陳執中妾榜殺婢有詔勿推抃復與官屬論列皆罷之改翰林學士承旨帝讀龜策傳問古人動作必由此乎對曰古有大疑旣決於已又詢於衆猶謂

不有天命於是命龜以斷吉凶所謂謀及乃心謀及卿士謀及庶人謀及卜筮蓋聖人貴誠不專人謀默與神契然後爲得也帝善其對諫官陳升之上選用責任考課三法命與中丞張昇典之卒亦無所進退再遷禮部侍郎五年樞副程戡罷帝欲用舊人卽以命抃歲中叅知政事年益耄無所可否韓縝彈之罷爲觀文殿學士同羣牧制置使英宗進戶部侍郎以太子少傅就第卒贈太子太保諡文懿

呂景初字冲之開封酸棗人以蔭試校書郎登進士歷汝州推官改著作佐郎知夏陽縣簽書河南府判官通判并州高若訥薦爲殿中侍御史張貴妃薨有司希旨輟朝七日又勸立忌景初論罷之又疏言比年兵冗由招收太多大臣偷安避怨未加揀汰羸疾老怯徒費粟帛戰則先奔雖有勇者相牽以敗望詔

中書密院議能招補而汰冗濫又言坐而論道宰臣之職乞從容以禮延問講談治道又與馬遵吳中復奏彈梁適與劉宗孟連姻而宗孟與冀州富人共商販下開封劾治不實皆坐謫景初判江寧徙知衡州復召還臺嘉祐初大雨水言陰盛陽微之誠商周之盛並建同姓兩漢皇子多封大國有唐宗室出爲刺史國朝二宗相繼尹京咸欲本支强盛有磐石之安則奸雄不敢內窺而天下有所倚望矣願擇宗子之賢者內於宮中問安視膳以消奸萌外使尹京典郡補之勢時狄青爲樞密使得士心景初數詣中書白請出之文彥博言青忠謹有素外言不足置意對曰青雖忠如衆心何大臣宜預爲朝廷慮竟出青知陳州李仲昌六渫事敗內遣中人置獄景初意賈昌朝爲之抗言事無根源不出政府恐陰邪用此以中傷善良乃議更遣

吳中復同訊遷右司諫安撫河北進戶部員外郎還奏比部郎鄭平占籍真定有田七百餘頃請均其徭役著限田令復兼侍御史知雜事尋判都水監改度支副使權吏部終天章閣待制知諫院

馬遵字仲塗樂平人以監察御史爲江淮發運判官就遷殿中侍御史爲副使入爲言事御史謫知宣州後復爲右司諫以禮部員外郎兼侍御史知雜事改吏部終直龍圖閣遵性樂易善議論其言事不爲激訐故多見推行杜衍范仲淹皆稱道之

吳中復字仲庶興國州永興人父仲舉爲南唐池陽令嘗殺曹彬招降使者城陷被執請死彬義而釋之中復進士及第知峨眉縣廢民淫祠居官廉代還不載一物擢通判潭州孫朴薦爲監察御史中復謂初不相識朴曰昔人耻爲呈身御史今豈有

職面臺官耶世爲名言俄遷殿中侍御史梁適罷亦出通判虔
州未至復還臺命往按六澤河內臣劉恢欲以動搖富弼密告
所斷岡與國姓并上名同中復馳至較其名乃趙征材也亦無
岡勢以故得止又彈罷劉沆改右司諫同知諫院遷知雜御史
轉戶部副使以天章閣待制歷知澤瀛二州移河東都轉運使
進龍圖閣直學士知江寧府有巡轄官苛刻郵兵繁而鞭之中
復以爲漸不可長戮其首惡而流其餘仍奏著令歷知成德永
興軍成都府錄韓琦疏語止青苗使者不肯先事擾民熙寧併
省郡邑言永康控制威茂不可廢爲縣卒從其議關內旱上疏
請賑時相坐以不實削一階提舉王隆觀起知荆南又坐過用
公使酒免卒年六十八性樂易簡約好周人急士大夫多稱之
從孫穉仁字智夫藍爲雍丘主簿元祐中金水河堤壞遷屬

庀役得詣朝堂白事宰相范純仁見而異之徽宗初畿內多盜以知大鹿縣始至令賊曰民窮爲盜我以鬻鎮之若亡命惟理故犯一切加誅毋得貸羣盜聞之相戒不入境中貴譚稹奴犯法按治亡所貸稹悲謗之徽宗遣戶部郎中朱喬年往鞠喬年矯仇吏也疾驅至慮囚撻隱剔挾帑庾出入不能得其毫毛乃歸傳舍擇仁上謁迎笑曰本來蔡君罪顧乃得一奇士吾行薦君矣尋召詣闕時方有事青唐掘熙河路運判升直祕閣爲副使從招討王厚領兵深入克蘭席城柵加直龍圖閣集賢殿脩撰爲京畿都轉運使鄆州城惡受命更築或譏雜以沙土反不如故帝怒密遣取塊土絨之而來令衛卒三授之堅敏如削鐵譏不能售拜戶部侍郎兼知開封故事三日一聽訟庭下列曹吏十輩呼云某人送獄某人當杖某人去而尹無所可否擇仁

視事日有寶鑑者以捕盜官諸司使服金帶徃故習來前擇仁
此而械諸獄一府大驚賣珠人倚勢匿宦官楊戩第擇仁跡取
之投竄于遠戡中以事出爲顯謨閣直學士知熙州徙永興軍
走馬承受監從熙言其擅改茶法奪免再歲起爲徽猷閣待制
領江淮發運使還直學士知渭州尋病提舉崇福宮起知青州
不克拜卒年六十六

高若訥字敏之榆次人徙衛州及第補彰德軍節度推官改著
作佐郎遷太常博士知商河縣故事職田牛種皆假於民若訥
以爲擾寧損不耕楊偕薦爲監察御史裏行遷主客員外郎殿
中侍御史改左司諫同管勾國子監遷起居舍人知諫院時范
仲淹以言事奪職余靖尹洙因論救仲淹坐貶歐陽脩移書責
以仲淹剛正兼通古今班行中無與爲比今君爲諫官目覩非

率而不能辨猶視面以見士大夫出入朝廷不復知人間有所謂羞恥事耶今而後決知足下非君子矣若訥忿上其書修亦生貶若訥加直史館轉刑部員外郎兼侍御史知雜事論王蒙正因緣戚里向徙郴州物議猶歎不可復予蔡州閭文應恣橫不法不宜爲入內都知二人皆徙罷又奏大慶殿國之路寢非行禮不御非法服不坐豈可聚老釋爲瀆慢二府留身得對幾及數刻何以盡萬幾宜賜坐從容如唐延英故事俄擢天章閣待制知永興軍轉河東都轉運使召還留判吏部流內銓兼侍讀權判刑部尚書母憂許給實俸服除加龍圖閣直學士史館修撰以右諫議大夫權御史中丞是春大旱帝問所由奏以陰陽不和責在宰相時賈昌朝吳育數爭事上前二人皆罷遂代育爲樞密副使奏河朔重兵所積王則小醜釋而不討且啓亂

階及城破朝議欲貸張得一死若訥劾其臣賊遂棄市皇祐初
拜工部侍郎參知政事三年爲樞密使多抑內降覆奏不行都
知王守忠欲得節度固執不可未幾以前驍段路人至死御史
奏罷爲觀文殿學士兼翰林侍讀復爲尚書左丞同羣牧制置
使判尚書都省卒贈左僕射謚文莊生平強學善記該通秦漢
以來諸史傳記尤喜申韓管子之書頗明曆學因母病兼通醫
書考校張仲景傷寒論訣孫思邈方書及外臺祕要行世後名
醫多出衛州皆本高氏學焉皇祐中制鐘律累奏定尺爭論連
年不決若訥以漢貨泉度一寸依隋書定尺十五種上之并損
益祠祭服器悉見施用有集二十卷

沈邁字子山弋陽人登進士起家大理評事知侯官縣通判廣
州累遷都官員外郎歷知真福二州慶曆初爲侍御史言爵祿

所以勸臣下非功而拔則爲濫今邊鄙屢警未聞廟堂之謀有以折外侮而以呂夷簡罷相輔臣皆進官無名進秩臣下何勸夏竦陰交內侍劉從愿內濟校誦外專機務奸黨得計人主之權去矣其言切直權鹽鐵判官轉兵部員外郎三年歐陽脩上言天下官吏實多賢愚善惡朝廷無由遍知乞置按察使選內外朝官丞郎中強幹廉明者爲之使至州縣遍見官吏凡有公廉可狀皆朱書名下中材者以墨書之歲具以聞迺首被選與李絢俱進直史館迺京東絢京西皆以轉運加按察使歲餘入爲侍御史知雜事未幾擢天章閣待制知滁州建徙河北陝西都轉運使歲中加刑部郎中知延州卒迺性疎爽有治才然少檢在廣州時歲遊劉王山會賓友縱酒與間里言笑無間

弘簡錄卷一百四十二

終